

Inatsisartut suleriaasiat § 37 immikkoortoq 1 naapertorlugu matumuuna Naalackersuisunut apeqqutit imaattut saqqummiuppakka:

1. **Naalackersuisut sulissutinginiarnerlungu Qasigiannguani Qeqertarsuarmilu timmisartukkut angalanermut akinik tulliani angallannermut isumaqatigiissusiulerunik akikinnerusumik angalasalernissaq?**
2. **Sooruna Kangaatsiamiit Aasiannut 15 minutsit timmisartornermi akikinnerusoq Qasigiannguaniit Ilulissanut timmisartornermut sanilliullugu?**
3. **Sooruna Upernavimmiit Kullorsuarmut 1 tiimit 15 minutsillu angalangaanni taamaallaat 900 kr. sinnilaanginnarlungit akeqartoq, uffa Qasigiannguaniit Ilulissanukarniaraanni 20 minutsit timmisartorniaraanni 1500 kr.-nit sinnerlugu aammalumi ilaanni 2200 kr.-ninik akeqartartoq? Sooruna isorartunerusumut ingerlasut akikinnermik akiliisartut?**
4. **Sooruna Qasigiannguani Qeqertarsuarmilu innuttaasut Nanortalimmiunut sanilliullutik timmisartukkut angalanialeraangamik akisunerusumik akiliisinneqartartut?**

(Kristian Jeremiassen, Siumut)

#### **Tungavilersuut:**

Qasigiannguani Qeqertarsuarmilu innuttaasut nunatsinni inoqarfinni assinngiinngitsuni qulaani taaneqartunut timmisartukkut angalanieraangamik akisunerusumik akiliisarput, tamannalu angallannermi isumaqatigiissusiornissami aaqqinneqartariaqartoq isumaqarpunga.

Naalackersuisut qulakkeertariaqarpaat Qasigiannguani Qeqertarsuarmilu tulliani angallannermut isumaqatigiissusiulerunik akinik appaanissartik, Qasigiannguanimi Qeqertarsuarmilu innuttaasunut angalanierneq akisuallaqaaq allaat innuttaasunut amerlanerpaanut angalanierneq akissaqarfingineqangilaq.

Akit pissarsiarivakka [airgreenland.gl](http://airgreenland.gl) – imi, siullertullu assersuusiorlanga: Kangaatsiamiit Aasiannukarniaraanni 1000 koruuni inorpaa, kisialli isorartussuserlu taannangajak Qasigiannguaniit Ilulissanukarniaraanni 1500 koruuninik sinneqarpoq allaammi ullut ilaanni 2200 koruuninik akeqartarluni, tassa imaappoq Qasigiannguani innuttaasut angalanierunik annertunerusumik Kangaatsiami innuttaasunut sanilliullutik annertunerujussuarmik akiliisarput.

Aappaattut assersusiorniarpunga Upernavimmiit Kullorsuarmut timmisartooq timmisarpoq 1 tiimit 15 minutsillu, tassa 400 km. missaa, taamaallaallu taanna akeqarpoq 900 koruuni sinnilaarlugu, Qasigiannguaniit Ilulissanukarniaraanni 20 minutsit 50 km. sinnilaarlugu, 1500 koruuni ilaanniluunniit 2200 koruuninik akeqartarpoq, tassani takuneqarsinnaavoq Qasigiarmiut aamma akisunerusumik akiliisartut, taamatullu Qeqertarsuarmiit Ilulissanukarniaraanni 1500 koruunit sinnilaarlugit akiliisarput ilaanniluunniit 2100 koruunit sinnerlugit akiliisinnaasartut, tamatumani erseqqippoq Qasigiannguani Qeqertarsuarmilu innuttaasut kingumut akisunerusumik akiliisartut.

Kingullertullu assersuusiorniarpunga Nanortalimmiit Narsarsuarmut aqut isorartuvoq kisianni aqut naanneq Qasigianguaniit Qeqertarsuarmiilluunniit Ilulissanukartoqarniarpat akisunerusumik akiliisarput.

Neriuppunga apequteqaatinga siunissami angallannermut isumaqatingiissusiortoqalerpat isinginiarneqassasoq nunatsinnimi piffinnut allanut sanilliullungit Qasigiarmiut Qeqertarsuarmiullu akisunerusumik angalasarnerat aaqqiiffingineqartariaqarmat.

Apequteqaatikka ullut suliffiusut qulit qaangiutsinnangit akineqarnissaat piumasarivara.